

**Z A K O N**  
**O IZMJENAMA I DOPUNAMA ZAKONA O TRŽIŠTU VRIJEDNOSNIH PAPIRA**

# **ZAKON**

## **O IZMJENAMA I DOPUNAMA ZAKONA O TRŽIŠTU VRIJEDNOSNIH PAPIRA**

### **Član 1.**

U Zakonu o tržištu vrijednosnih papira („Službene novine Federacije BiH“, br. 85/08, 109/12 i 86/15) iza člana 3. dodaje se novi član 3a. koji glasi:

### **„Član 3a.**

#### **Pravne posljedice osude**

Pravne posljedice osude su događaji ili okolnosti u vezi sa pravnim ili fizičkim licem koje su u suprotnosti sa odredbama ovog zakona, drugog zakona i akata donesenih na osnovu njih, odnosno saglasnosti Komisije u skladu sa odredbama ovog zakona, a takvo lice je ili se na njega primjenjuje:

- a) pravomoćno osuđivano za krivična djela protiv radnih odnosa, privrede, imovine, pravosuđa, pranja novca, finansiranja terorizma, javnog reda, pravnog prometa i službene dužnosti, koruptivna krivična djela ili za krivična djela utvrđena ovim zakonom te druga krivična djela, izuzev krivičnih djela protiv sigurnosti saobraćaja, uključujući povezana lica sa tim licima u smislu ovog zakona;
- b) u posljednjih pet godina počinilo težu povredu, odnosno ponavljanje povrede ovog zakona, ili koje se odnose na preuzimanja dioničkih društava, investicijske fondove, zakon kojim se uređuje sprečavanje pranja novca i finansiranje terorističkih aktivnosti, zakon kojim se regulira poslovanje banaka, društava za osiguranje, propisi Komisije, akti uređenog javnog tržišta ili Registra, a koje se odnose na ili su za posledicu imale: neistinито objavljivanje informacija, odnosno objavljivanje informacija koje dovode u zabludu, ponašanje suprotno odredbama o zloupotrebama na tržištu iz ovog zakona, povredu obaveze čuvanja poslovne tajne, ugrožavanje interesa učesnika na tržištu vrijednosnih papira;
- c) u posljednjih pet godina počinilo težu povredu, odnosno ponavljanje povrede propisa iz tačke b) ovog člana, a koja se odnosi ili je za posledicu imala: prestanak obavljanja dužnosti direktora ili lica sa dozvolom po ovom zakonu u profesionalnom posredniku i drugom učesniku na tržištu vrijednosnih papira, ili obustavljanje, odnosno oduzimanje dozvole za obavljanje poslova s vrijednosnim papirima;
- d) u posljednjih pet godina na lice je primijenjena sankcija, odnosno mjera prema zakonima ili podzakonskim aktima strane države, a koja predstavlja sličnu, odnosno uporedivu sankciju ili mjeru iz ovog člana.“.

### **Član 2.**

Iza člana 76b. dodaje se novi član 76c. koji glasi:

### **„Član 76c.**

#### **Odbijanje davanja saglasnosti**

Komisija neće dati saglasnost za sticanje kvalifikovanog udjela ukoliko:

- a) postoje pravne posljedice osude iz člana 3a. ovog zakona;

- b) namjeravani sticalac nema dobar ugled, odnosno za kojeg na osnovu dosadašnjeg ponašanja nije moguće opravdano zaključiti da će pošteno i savjesno vršiti svoje dužnosti kao imalac udjela te za kojeg postoji osnovana sumnja da je na bilo koji način učestvovao u aktivnostima vezanim uz pranje novca, finansiranje terorizma i korupciju;
- c) postoje prepreke prema općim aktima Komisije.“.

### **Član 3.**

U članu 91. u stavu 1. tač. b) i c) mijenjaju se i glase:

„b) da ne postoje pravne posljedice osude iz člana 3a. ovog zakona;

c) da kandidat za direktora ima dobar ugled, odnosno za kojeg je na osnovu dosadašnjeg ponašanja moguće opravdano zaključiti da će pošteno i savjesno vršiti svoje dužnosti te za kojeg ne postoji osnovana sumnja da je na bilo koji način učestvovao u aktivnostima vezanim uz pranje novca, finansiranje terorizma i korupciju;“.

### **Član 4.**

U članu 104. u stavu 1. tač. b) i c) mijenjaju se i glase:

„b) da ne postoje pravne posljedice osude iz člana 3a. ovog zakona;

c) broker, investicijski menadžer i investicijski savjetnik ima dobar ugled, odnosno za kojeg je na osnovu dosadašnjeg ponašanja moguće opravdano zaključiti da će pošteno i savjesno vršiti svoje dužnosti te za kojeg ne postoji osnovana sumnja da je na bilo koji način učestvovao u aktivnostima vezanim uz pranje novca, finansiranje terorizma i korupciju;“.

### **Član 5.**

U članu 140a. iza riječi: „76a.“ veznik: „i“ zamjenjuje se zarezom, a iza riječi: „76b.“ dodaju se riječi: „i 76c.“.

### **Član 6.**

U članu 143. u stavu 1. tač. b) i c) mijenjaju se i glase:

„b) da ne postoje pravne posljedice osude iz člana 3a. ovog zakona;

c) kandidat za direktora ima dobar ugled, odnosno za kojeg je na osnovu dosadašnjeg ponašanja moguće opravdano zaključiti da će pošteno i savjesno vršiti svoje dužnosti te za kojeg ne postoji osnovana sumnja da je na bilo koji način učestvovao u aktivnostima vezanim uz pranje novca, finansiranje terorizma i korupciju;“.

### **Član 7.**

Iza člana 186. dodaje se novi član 186a. koji glasi:

#### **„Član 186a. Shodna primjena**

Direktor i zamjenik direktora Registra ne mogu biti lica za koja postoje prepreke predviđene ovim zakonom za direktora berze.“.

## **Član 8.**

- (1) Odredbe ovog zakona primjenjuju se i na osobe koje stupanjem na snagu ovog zakona vrše funkciju člana nadzornog odbora, uprave, brokera, investicijskog menadžera i investicijskog savjetnika i na fizička i pravna lica imaoce kvalifikovanih udjela.
- (2) Pravna i fizička lica iz stava (1) ovog člana dužna su Komisiji podnijeti zahtjev sa dokazima o ispunjavanju uvjeta iz ovog zakona u roku četiri mjeseca od dana stupanja na snagu ovog zakona.

## **Član 9.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**PREDSJEDAVAJUĆA  
DOMA NARODA  
PARLAMENTA FEDERACIJE BiH**

**Lidija Bradara**

**PREDSJEDAVAJUĆI  
PREDSTAVNIČKOG DOMA  
PARLAMENTA FEDERACIJE BiH**

**Edin Mušić**